

农歌集钞

戴昺

侍屏翁游屏山分得水字

携琴入空山，修竹翠相倚。一曲千古心，泠泠寄流水。拂云卧白石，冥搜契玄理。有时采薪人，歌声隔林起。

秋日过屏山庵

凄切抱叶蝉，问关栖树禽。入山本避喧，复爱聆此音。微颺动夕爽，薄云散秋阴。众籁阒以静，片月生东林。

逐疰鬼

咄哉疰鬼何冥愚，沉魄犹滞江流居。孰云胄出高阳氏，而乃不肖如此欤。为妖常闯秋令动，作威又窃炎官馀。今年恣睢逞暴虐，十户九室闻嗟吁。人生一岁一寒暑，自有大疰缠其躯。翻手为凉覆手暖，笑尔祸福才须臾。痴儿駮女或汝怖，那能吓我烈丈夫。汝不记少陵诗句有神语，子璋髑髅血模糊。昌黎遣逐更多术，灌毒炷艾挥灵符。今来古往共憎疾，奈何长恶终不渝。胡不学蛟人，细织冰绡制云裾，胡不从湘君，缓移桂棹搴芙蕖。乃甘卑溲贾众怨，厌襁唾骂无时无。尔来经旬瞰吾室，再三谢遣犹踟蹰。吾诗吾酒既不废，汝穷汝技将何如。大江秋色正潇洒，明月皎皎风疏松。便须悟悔速归去，啸俦呼侣相嬉娱。夜阑吟彻欲就睡，灯花照眼团如珠。梦回病思砉然散，飒飒风籁生庭梧。

辛亥九日被檄视漉遂爽同官饮菊之约夜宿荒驿风雨达曙

孤负重阳菊，愁怀不肯宽。邮亭一夜雨，客枕五更寒。脚健从渠老，心低到处安。独行谁可语，时把古诗看。

纳凉即事

炎蒸欣傍晚，扫地坐宽凉。入竹风逾冷，生荷水亦香。蚁行缘食几，萤照落书床。听得农人语，今年稻穗长。

偕兄侍屏翁探梅屏山分得空字

踏破登山屐，来寻傍水丛。眼明千树底，春在数花中。格瘦诗难写，香寒酒易空。狂歌归秉烛，惊怪走儿童。

安居

安居元自好，春昼更迟迟。雪涌煎茶鼎，云生浴砚池。栽荷填废沼，移竹补疏篱。犹有闲光景，欹眠续旧诗。

次韵屏翁新秋

检点新秋事，天公赐已丰。秋床梧叶雨，晓袂竹林风。阅世心先老，伤时酒易中。谁将和战议，细与问元戎。

己亥十月晦大雷雨

舛运频年见，忧时百虑灰。入冬常苦雨，昨夜又轰雷。土烂麦难种，虫伤菜失栽。儿童不解事，喜报海棠开。

次韵屏翁冬日

晓起冲寒出，霜明日未昕。麦丰来岁本，梅漏早春机。水涸鱼深隐，蜜成蜂倦飞。静中参物理，一一见精微。

自武林还家道由剡中

一筇双不借，役役又东还。野渡浅深水，夕阳高下山。光阴虚我老，造物靳人闲。高躅思吾祖，鸣琴独闭关。

次韵君玉弟春事

海棠红未了，又近牡丹时。送日多忙事，酬春欠好诗。暖风催麦早，晴晷转花迟。不尽清游兴，重为上巳期。

次韵晚春二首

一襟尘欲满，刮眼得新诗。风絮遗春恨，烟花隔岁期。笋抽虫半蚀，樱熟鸟先窥。光景浑如此，心闲即好时。

田园深有趣，已分隐柴扃。老去情多感，春来梦少灵。游丝卷晴日，飞絮入空庭。预识今年好，啼鹃枕上听。

春晚即事

春郊农务急，野岸水痕高。蒲渚鸣姑恶，桑林啜伯劳。整栏扶芍药，塞网护樱桃。不改穷居乐，何妨见二毛。

次韵屏翁初夏会芳小集

一觴还一咏，竟日醉难成。坐石惊云湿，临池爱水平。密林宜午荫，啼鸟尚春声。更有樱桃约，明朝且愿晴。

夏初郊行

晴雨天难测，寒暄气未齐。连村多绿树，终日啜黄鹂。田水冲塍断，山云着地低。偶随农叟语，不觉遇桥西。

僻居

地僻尘嚣远，身闲趣味深。清池涵竹色，老树带藤阴。引鹤随闲步，招蝉伴醉吟。有时燃古鼎，隐几自观心。

亦龙弟覆篔簹石作亭其阴屏翁名曰野亭索诗漫赋

高怀抗尘外，林杪着三间。绿绕村边树，青浮海上山。目穷天变化，心静地宽闲。鸥鸟知人乐，忘机亦往还。

秋晚

西风澄晓气，凝观愜幽情。草润蛩声滑，松凉鹤梦清。吟怀依水静，病思得秋轻。忽忆登高近，循篱看菊英。

郑安道终岁相聚临别以诗见贻次韵为谢

解把诗言别，那无计可留。梅花两心事，寒雁五更愁。我亦高悬榻，君须独卧楼。后回相忆处，莫返雪中舟。

夏曼卿作新楼扁曰潇湘片景来求拙画且索诗

有此一楼足，悠然万虑忘。拓开风月地，压断水云乡。四野留春色，千峰明夕阳。眼前无限景，何处认潇湘。

幽栖

幽栖颇喜隔嚣喧，无客柴门尽日关。汲水灌花私雨露，临池叠石幻溪山。四时有景常能好，一世无人放得闲。清坐小亭观众妙，数声黄鸟绿阴间。

此生

此生毕竟已蹉跎，有酒何妨醉且歌。人世尽缘愁得老，春花偏被雨相魔。
草欺兰瘦能香否，杏笑梅残奈俗何。试上东楼看霁景，海山无数列青螺。

书房

书房清晓焚香坐，转觉幽栖趣味真。怪石一根云态度，早梅半树雪精神。
池鱼自乐谁知我，林鸟相忘不避人。得丧由来天自定，莫将闲虑恼闲身。

移古梅植於贮清之侧已有生意喜而赋之

剥尽皮毛真实在，几年孤立小溪浔。人来人去谁青眼，花落花开自苦心。
不是野夫同臭味，难教君子出山林。巡檐日日窥生意，一朵先春直万金。

再得古梅小而益怪首蒙屏翁品题因次韵

爱渠怪怪复奇奇，冒雪遥凭健步移。竹外池边栽恰好，山巅水际梦多时。
百年死质馀生意，一片孤槎带好枝。寄语花神勤守护，品题莫负老仙诗。

观败棋者戏作

看人出着笑人低，及至当枰却自迷。角上仅全输了腹，东边才活丧於西。
欲装劫去多难补，待算征来恰又提。天下未应无妙手，劝君莫爱墨狻猊。

闲居幽事

闲居幽事属田园，何必山林始避喧。足水早禾分母子，多年修竹见翁孙。
欣然胜败无心弈，兀尔醉醒随意樽。昨夜一番雷雨过，绿波微涨曲池痕。

己亥九日屏翁约诸孙登高西屿阻风舟行不前遂会於吾家山海图之上酒边翁
有诗留题因次韵

良辰乐事两相关，喜我楼台便往还。不用移舟过西屿，只消把酒对南山。
风於破帽如相约，菊为新刍欲笑颜。留作千年佳话处，诗翁醉墨照楣间。

秋日独倚东楼

重阳过了秋逾爽，自豁楼窗眺晚西。野外倒涵天影动，海云平压雁行低。
兴来频放深杯饮，吟到须还大字题。近喜书房添一宝，陶泓买得古端溪。

次韵屏翁壬寅九日再题小楼

佳节相过共举觞，为萸菊醉亦何妨。须知我辈襟怀事，不是时人酒肉狂。

落雁影边寒水碧，归鸦啼处夕阳黄。诗翁樽俎风流在，老气横吞年少场。

初冬梅花偷放颇盛

清樽才了黄花债，又被梅花恼杀人。妆点南枝无数雪，探支东帝几分春。
精神全向疏中足，标格端於瘦处真。彻夜苦吟无好语，梦随双月步溪澹。

四月节景

茶歌才了又田歌，节物真成一鸟过。苍竹招风凉意足，碧梧留雨夜声多。
瓜缘茅屋抽长蔓，藕过蔬畦出矮荷。最喜白鸥相狎久，对人自在浴清波。

次韵郑安道怀君玉弟游东嘉

好山好水东嘉郡，两月清游乐可知。远想池塘频梦汝，还当风雨对眠谁。
别时菊蕊方宜酒，几日梅花已索诗。雁影参差霜正冷，寄言归计莫迟迟。

春事

春事关心常早起，爱看景物试凭栏。戏鱼池面微添绿，啼鸟枝头尚带寒。
斩棘重樊新插柳，泉频灌自栽兰。年来剩有园林兴，每恨庐边地不宽。

赏茶

自汲香泉带落花，漫烧石鼎试新茶。绿阴天气闲庭院，卧听黄蜂报晚衙。

夜过监湖

推篷四望水连空，一片蒲帆正饱风。山际白云天际月，子规声在白云中。

喜小儿学步

对周尚有六十日，举足已能三五移。世路只今巖险甚，须教步步着平夷。

夏昼小雨

小床蕲簟展琉璃，窗外新篁一尺围。正午云桥疏雨遇，冬青花上蜜蜂归。

里中小渔舟被差防江有感而赋

着身平地更多忧，一棹思为泛宅谋。昨夜西风边报急，防江也要钓鱼舟。

天台道上早行

篋輿轧轧过清溪，溪上梅花压水低。月影渐收天半晓，两山相对竹鸡啼。

五禽言

提葫芦，沽美酒，人世光阴春电走。一日得醉一日闲，绿鬓几曾俱白首。
沽酒沽酒有酒沽，生前不饮真愚夫。

不如归去，不如归去，千山万水家乡路。今年又负故园花，来岁花开定归否。归去归去须早归，近日江湖非旧时。

泥滑滑，泥滑滑，客路迢迢雨不歇。我仆十步九步蹶，我马<马鬣><马>如跛
蹩泥滑泥滑君莫愁，秧烂麦损尤堪忧。

脱却破袴，脱却破袴，蚕熟纛成霜雪缕。小姑织绢未落机，县家火急催官赋。
输了官赋无零落，破袴破袴还更着。

麦熟锻磨，麦熟锻磨，村南村北声相和。大男小女总欣欣，煮饼蒸糜任渠做。
锻磨锻磨莫等闲，去年糠粃无得餐。

小畦

小畦寻丈许，凿壁置柴扉。雨后菜虫死，秋来花蝶稀。插篱新种菊，抱瓮已忘机。
俗客忽相访，妨人洗布衣。

有感

浩浩海风劲，滔滔河水浑。古人皆去世，乔木自当门。族党诸孙盛，吾宗一线存。
兴衰知有数，心事与谁论。

十日取野菊从酒

野径菊仍好，村垆酒亦嘉。未应今日蕊，便是背时花。心在家千里，身犹客九华。
官程难久驻，风雨暮山斜。

山家小憩即景效药名体

柴门通草径，茅屋桂枝间。修竹连翘木，高松续断山。仰空青荫密，扫石绿花斑。
傍涧牵牛饮，白头翁自闲。

从板桥买舟上青阳

卸马板桥西，扁舟逆上溪。水瘦岩骨断，烟截树头齐。野鸭惊人起，村鸡上树啼。老农头雪白，犹自把锄犁。

抵池阳未入关泊於斋山数日因穷岩壑之胜山有翠微亭，杜牧之登高处瘦策相扶上翠微，眼惊奇怪足忘疲。三十六洞犹昔者，四百余年无牧之。涨水淼弥春雨后，远山重叠夕阳时。几多江北江南恨，问着沙鸥总不知。

秋暮出关即事

俗尘汨汨负清游，重出城来已暮秋。水洗柳根欹断岸，霜摧芦叶拥荒洲。乡音不到愁来雁，野性无拘羨去鸥。可惜一堤明月好，隔关难作夜深留。

归途过麻姑山

山行十里少人家，客子贪程怕日斜。倦坐松根需足力，轻风满面落藤花。

五松山太白祠堂太白读书之地，诗有“要回长舞袖，尽拂五松山”，即此山也

舣舟来访宝云寺，快上山头寻五松。捉月仙人呼不醒，一间老屋战西风。

归途过铜官山

山径崎岖落叶黄，青松疏处漏斜阳。鸣禽无数声相应，一阵微风野菊香。
农歌集补钞

戴昺

春日偕兄弟侍屏翁游晋原分得外字因集句而成

春雨晴亦佳，适与赏心会。初日照高林，幽泥化轻壘。步履随春风，始觉天宇大。牵怀到空山，逍遥白云外。青松夹路生，童童状车盖。清川带华薄，阴壑生虚籁。性达形迹忘，傲然脱冠带。薄暮方来归，月光摇浅濑。

上立斋先生一首以有官居鼎鼎无宅起楼台为韵

灵岩一片云，曾为作雨起。风吹还故山，松筠澹相倚。秋高霜露寒，酒热鲈鱼美。少宽忧世怀，微醉有妙理。

杂言

提壶劝我饮，布谷催我耕。我酒瓶已罄，我田草正生。荷锄理荒秽，及时
新雨晴。秋来刈吾秫，庶得雨遂情。

侍屏翁领客游雪峰分得生字

雪峰峰顶寺，来此定诗盟。山瀑分云影，松风乱雨声。眼明春树绿，心醒
晓钟清。未好言归去，尘中事又生。

谢赵山台见访

寂寞海东头，殷勤贵客舟。如何经岁约，只作一宵留。清玩分行篋，高吟
压小楼。更须谋再会，同醉菊花秋。

项宜父涉趣园

四面山回合，中间百亩畦。入门惟见竹，绕屋半栽梅。果熟霜前树，鱼肥
雨后溪。秋来饶景物，斟酌费诗材。

玉峰登眺得初字

玉峰奇绝处，短策步崎岖。海近潮声壮，山空树影疏。吟情危眺外，饮兴
薄寒初。数点新来雁，高飞不羨渠。

初游方岩山

图志旧尝看纪载，杖藜今得遍经行。渔翁化石几年钓，仙客有田何世耕。
千尺枯崖蜕龙骨，一帘飞瀑撼雷声。相传逸少曾来此，惜不镌岩记姓名。

如京至西兴阻风雨

月将圆夜出乡关，才到西兴月又残。老去问名先已懒，近来行路觉犹难。
云烟漠漠吴山暗，风雨潇潇浙水寒。识破人生真逆旅，此身何处不堪安。

严于陵

赤伏君王访旧游，富春男子只羊裘。一竿本为逃名去，何意虚名上钓钩。